

## 2 Thissalunīkiyoñ

<sup>1</sup> Yih khat Paulus, Silwānus aur Tīmuthiyus kī taraf se hai.

Ham Thissalunīkiyoñ kī jamāt ko likh rahe haiñ, unheñ jo Allāh hamāre Bāp aur Kḥudāwand Īsā Masīh par imān lāe haiñ.

<sup>2</sup> Kḥudā hamārā Bāp aur Kḥudāwand Īsā Masīh āp ko fazl aur salāmatī baḥsheñ.

### *Masīh kī Āmad par Adālat*

<sup>3</sup> Bhāiyo, wājib hai ki ham har waqt āp ke lie Kḥudā kā shukr karen. Hāñ, yih mauzūn hai, kyoñki āp kā imān hairatangez taraqqī kar rahā hai aur āp sab kī ek dūsre se muhabbat baḥh rahī hai.

<sup>4</sup> Yihī wajah hai ki ham Allāh kī dīgar jamātoñ meñ āp par faḥhr karte haiñ. Hāñ, ham faḥhr karte haiñ ki āp in dinoñ meñ kitnī sābitqadmī aur imān dikhā rahe haiñ hālāñki āp bahut izārasāniyāñ aur musībateñ bardāsht kar rahe haiñ.

<sup>5</sup> Yih sab kuchh sābit kartā hai ki Allāh kī adālat rāst hai, aur natīje meñ āp us kī bādshāhī ke lāyq ṭahreñge, jis ke lie āp ab dukh uṭhā rahe haiñ.

<sup>6</sup> Allāh wuhī kuchh karegā jo rāst hai. Wuh unheñ musībatoñ meñ dāl degā jo āp ko musibat meñ dāl rahe haiñ,

<sup>7</sup> aur āp ko jo musibat meñ haiñ hamāre samet ārām degā. Wuh yih us waqt karegā

jab Ḳhudāwand Īsā apne qawī farishton ke sāth āsmān par se ā kar zāhir hogā

<sup>8</sup> aur bharaktī huī āg meñ unheñ sazā degā jo na Allāh ko jānte haiñ, na hamāre Ḳhudāwand Īsā kī ḳhushḳhabrī ke tābe haiñ.

<sup>9</sup> Aise log abadī halākat kī sazā pāeñge, wuh hameshā tak Ḳhudāwand kī huzūrī aur us kī jalālī qudrat se dūr ho jāeñge.

<sup>10</sup> Lekin us din Ḳhudāwand is lie bhī āegā ki apne muqaddasīn meñ jalāl pāe aur tamām imāndāron meñ hairat kā bāis ho. Āp bhī un meñ shāmil hoñge, kyoñki āp us par imān lāe jis kī gawāhī ham ne āp ko dī.

<sup>11</sup> Yih pesh-e-nazar rakh kar ham lagātār āp ke lie duā karte haiñ. Hamārā Ḳhudā āp ko us bulāwe ke lāyq ṭhahrāe jis ke lie āp ko bulāyā gayā hai. Aur wuh apnī qudrat se āp kī nekī karne kī har ḳhāhish aur āp ke imān kā har kām takmīl tak pahuñchāe.

<sup>12</sup> Kyoñki is tarah hī hamāre Ḳhudāwand Īsā kā nām āp meñ jalāl pāegā aur āp bhī us meñ jalāl pāeñge, us fazl ke mutābiq jo hamāre Ḳhudā aur Ḳhudāwand Īsā Masīh ne āp ko diyā hai.

## 2

### *“Bedīnī kā Ādmī”*

<sup>1</sup> Bhāiyō, yih sawāl uṭhā hai ki hamāre Ḳhudāwand Īsā Masīh kī āmad kaisī hogī? Ham kis tarah us ke sāth jamā ho jāeñge? Is nāte se hamārī āp se darḳhāst hai

<sup>2</sup> ki jab log kahte haiñ ki Ḳhudāwand kā din ā chukā hai to āp jaldī se bechain yā pareshān

na ho jāeñ. Un kī bāt na māneñ, chāhe wuh yih dāwā bhī kareñ ki un ke pās hamārī taraf se koī nabuwwat, paighām yā khat hai.

<sup>3</sup> Koī bhī āp ko kisī bhī chāl se fareb na de, kyoñki yih dīn us waqt tak nahīñ āegā jab tak ākhirī baḡhāwat pesh na āe aur “Bedīnī kā ādmī” zāhir na ho jāe, wuh jis kā anjām halākat hogā.

<sup>4</sup> Wuh har ek kī muḡhālafat karegā jo Ḳhudā aur mābūd kahlātā hai aur apne āp ko un sab se barā ṭhahrāegā. Hāñ, wuh Allāh ke ghar meñ baiṭh kar elān karegā, “Main Allāh hūñ.”

<sup>5</sup> Kyā āp ko yād nahīñ ki main āp ko yih batātā rahā jab abhī āp ke pās thā?

<sup>6</sup> Aur ab āp jānte haiñ ki kyā kuchh use rok rahā hai tāki wuh apne muḡarrarā waqt par zāhir ho jāe.

<sup>7</sup> Kyoñki yih purasrār bedīnī ab bhī asar kar rahī hai. Lekin yih us waqt tak zāhir nahīñ hogī jab tak wuh shaḡhs haṭ na jāe jo ab tak use rok rahā hai.

<sup>8</sup> Phir hī “Bedīnī kā ādmī” zāhir hogā. Lekin jab Ḳhudāwand Īsā āegā to wuh use apne muñh kī phūñk se mār dālegā, zāhir hone par hī wuh use halāk kar degā.

<sup>9</sup> “Bedīnī ke ādmī” meñ Iblīs kām karegā. Jab wuh āegā to har qism kī tāqat kā izhār karegā. Wuh jhūṭe nishān aur mojize pesh karegā.

<sup>10</sup> Yoñ wuh unheñ har tarah ke sharīr fareb meñ phañsāegā jo halāk hone wāle haiñ. Log is lie halāk ho jāeñge ki unhoñ ne sachchāi se muhabbat karne se inkār kiyā, warnā wuh bach jāte.

<sup>11</sup> Is wajah se Allāh unheñ burī tarah se fareb meñ phañsne detā hai tāki wuh is jhūṭ par īmān lāeñ.

<sup>12</sup> Natije meñ sab jo sachchāi par īmān na lāe balki nārastī se lutfandoz hue mujrim ṭhahreñge.

### *Āp ko Najāt ke lie Chun Liyā Gayā Hai*

<sup>13</sup> Mere bhāiyo, wājib hai ki ham har waqt āp ke lie Ḳhudā kā shukr karen jinheñ Ḳhudāwand pyār kartā hai. Kyoñki Allāh ne āp ko shurū hī se najāt pāne ke lie chun liyā, aisī najāt ke lie jo Rūhul-quds se pākīzagī pā kar sachchāi par īmān lāne se hāsīl hotī hai.

<sup>14</sup> Allāh ne āp ko us waqt yih najāt pāne ke lie bulā liyā jab ham ne āp ko us kī ḳhushḳhabrī sunāī. Aur ab āp hamāre Ḳhudāwand Īsā Masīh ke jalāl meñ sharīk ho sakte haiñ.

<sup>15</sup> Bhāiyo, is lie sābitqadam raheñ aur un riwāyāt ko thāme rakheñ jo ham ne āp ko sikhāi haiñ, ḳhāh zabānī yā ḳhat ke zariye.

<sup>16</sup> Hamārā Ḳhudāwand Īsā Masīh ḳhud aur Ḳhudā hamārā Bāp jis ne ham se muhabbat rakhī aur apne fazl se hameñ abadī tasallī aur ṭhos ummīd baḳhshī

<sup>17</sup> āp kī hauslā-afzāī kare aur yoñ mazbūt kare ki āp hameshā wuh kuchh boleñ aur karen jo achchhā hai.

## 3

### *Hamāre lie Duā Karnā*

<sup>1</sup> Bhāiyo, ek āḳhirī bāt, hamāre lie duā karen ki Ḳhudāwand kā paighām jaldī se phail jāe

aur izzat pāe, bilkul usī tarah jis tarah āp ke darmiyān huā.

<sup>2</sup> Is ke lie bhī duā karen ki Allāh hameñ ghalat aur sharīr logoñ se bachāe rakhe, kyoñki sab to imān nahīñ rakhte.

<sup>3</sup> Lekin Ḳhudāwand wafādār hai, aur wuhī āp ko mazbūt karke Iblīs se mahfūz rakhegā.

<sup>4</sup> Ham Ḳhudāwand meñ āp par etamād rakhte haiñ ki āp wuh kuchh kar rahe haiñ balki karte raheñge jo ham ne āp ko karne ko kahā thā.

<sup>5</sup> Ḳhudāwand āp ke diloñ ko Allāh kī muhabbat aur Masīh kī sābitqadmī kī taraf māyl kartā rahe.

### *Kām Karne kā Farz*

<sup>6</sup> Bhāiyo, apne Ḳhudāwand Īsā Masīh ke nām meñ ham āp ko hukm dete haiñ ki har us bhāi se kinārā karen jo beqāydā chaltā aur jo ham se pāi huī riwāyat ke mutābiq zindagī nahīñ guzartā.

<sup>7</sup> Āp Ḳhud jānte haiñ ki āp ko kis tarah hamāre namūne par chalnā chāhie. Jab ham āp ke pās the to hamārī zindagī meñ betartībī nahīñ pāi jāti thī.

<sup>8</sup> Ham ne kisī kā khānā bhī paise die baḡhair na khāyā, balki din rāt saḡht mehnat-mashaqqat karte rahe tāki āp meñ se kisī ke lie bojh na baneñ.

<sup>9</sup> Bāt yih nahīñ ki hameñ āp se muāwazā milne kā haq nahīñ thā. Nahīñ, ham ne aisā kiyā tāki ham āp ke lie achchhā namūnā baneñ aur āp is namūne par chaleñ.

<sup>10</sup> Jab ham abhī āp ke pās the to ham ne āp ko hukm diyā, “Jo kām nahīñ karnā chāhtā wuh khānā bhī na khāe.”

<sup>11</sup> Ab hamen̄ yih khabar milī hai ki āp men̄ se bāz beqāydā zindagī guzārte haiñ. Wuh kām nahīn karte balki dūson̄ ke kāmōn̄ men̄ kḥāhmaḥhāh daḥhl dete haiñ.

<sup>12</sup> Ḳhudāwand Īsā Masīh ke nām men̄ ham aise logon̄ ko hukm dete aur samjhāte haiñ ki āram se kām karke apnī rozī kamāen̄.

<sup>13</sup> Bhāiyō, āp bhalāī karne se kabhī himmat na hāren̄.

<sup>14</sup> Agar koī is khat men̄ darj hamārī hidāyat par amal na karē to us se tālluq na rakhnā tāki use sharm āe.

<sup>15</sup> Lekin̄ use dushman mat samajhnā balki use bhāī jān kar samjhānā.

### *Ākhirī Alfāz*

<sup>16</sup> Ḳhudāwand kḥud jo salāmatī kā sar-chashmā hai āp ko har waqt aur har tarah se salāmatī baḥshe. Ḳhudāwand āp sab ke sāth ho.

<sup>17</sup> Maiñ, Paulus apne hāth se yih likh rahā hūn. Merī taraf se salām. Maiñ isī tarīqe se apne har khat par dastkhat kartā aur isī tarah likhtā hūn.

<sup>18</sup> Hamāre Ḳhudāwand Īsā Masīh kā fazl āp sab ke sāth rahe.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

---

PDF generated using Haiola and XeLaTeX on 1 Oct 2024 from source files dated 20 Sep 2024

123ff8cb-27b3-5817-a02a-22e67145fd30